

## SAOPŠTENJE ZA MEDIJE

### **Instalacija *Život u dimu* privukla je više od 10.000 posjetilaca u Banjaluci, Mostaru i Sarajevu koji traže hitno djelovanje na zabrani pušenja u svim zatvorenim javnim prostorima**

**SARAJEVO, 19. novembar 2018.** – *Život u dimu* – kreativna instalacija za aktivnu podršku i podizanje svijesti o štetnom djelovanju duhanskog dima i neophodnosti zabrane pušenja u zatvorenom prostoru na svim javnim mjestima širom BiH, je postavljena u Banjaluci, Mostaru i Sarajevu 16. i 17. novembra 2018.

Kreativna instalacija *Život u dimu* koja za cilj ima prikazati kako izgleda borba građana za čist zrak u zatvorenim prostorijama punim duhanskog dima, okupila je preko 10.000 ljudi. Građani su iskazali podršku inicijativi [Klima bez dima](#) koja je organizovala dvodnevni događaj s ciljem zagovaranja novih zakonskih rješenja kojim bi se zabranilo pušenje u zatvorenom prostoru. Mnogi od onih koji pružaju podršku ovome su i sami pušači.

Instalacija *Život u dimu* je posjetiocima pružila jedinstvenu priliku da se upoznaju sa štetnim djelovanjem upotrebe duhana i izloženosti duhanskom dimu.

*“U ovoj kampanji se ne radi o oduzimanju cigareta odraslima koji su odlučili da puše”, rekao je Emanuel Salinas, šef ureda Svjetske banke za Bosnu i Hercegovinu i Crnu Goru. “Riječ je o zaštiti djece i onih koji su izabrali da ne puše, omogućavajući im okruženje bez duhanskog dima u zatvorenom prostoru na javnim mjestim, gdje neće biti žrtve duhanskog dima.”*

U BiH svake godine umre oko 9.000 ljudi od bolesti povezanih s duhanom; 900 od njih su pasivni pušači, uključujući i djecu koja su izložena dimu od pušača iz njihove okoline i na javnim mjestima. Ako se ništa ne poduzme, u BiH će u naredne dvije decenije od bolesti vezanih za upotrebu duhana prerano umrijeti 180.000 ljudi.

Takav žalosni gubitak života ima velike posljedice po porodice, zajednice i zemlju u cjelini, a troškovi liječenja bolesti uzrokovanih pušenjem predstavljaju veliki teret za cijelo društvo.

*“U duhanskom dimu je 7.000 sastojaka, tj. otrova koji predstavljaju 7.000 razloga koji se ne mogu ignorirati, niti biti predmet djelimičnih rješenja. Pravo na zdravlje ne prestaje tamo gdje počinje nečije pravo na izbor, a pušenje predstavlja rizično ponašanje po zdravlje pušača, ali i svih drugih”, naglasila je prof. dr. Aida Ramić iz Zavoda za javno zdravstvo FBiH.*

Ovim se naglašava ogroman rizik po veliki broj ljudi i kako se to pretače u nepotrebno obolijevanje.

*“Aktivni pušači imaju oko 20 puta veće šanse da obole od raka, a nepušači koji žive s pušačima imaju 30% veće šanse da će oboliti od raka pluća. Brojevi su neumoljivi”, zaključila je dr. Snežana Kutlešić Stević, šefica odjeljenja pulmološke rehabilitacije u Zavodu dr. Miroslav Zotović u Banja Luci.*

Svi smo mi odgovorni za zaustavljanje ove epidemije u zemlji i trebamo djelovati sada. Usvajanje i primjena entitetskih zakona o kontroli duhana je prioritet i biće od ogromnog značaja za zdravlje građana Bosne i Hercegovine i njenu ekonomiju.

Ovaj događaj je organiziran u okviru inicijative [Klima bez dima](#) koja za cilj ima doprinjeti podizanju svijesti i pružanju podrške za osiguranje okruženja bez duhanskog dima u zatvorenom prostoru na javnim mjestima, kako bi se zaštitilo zdravlje stanovništva BiH. Ova inicijativa je dio projekta [Smanjenje faktora zdravstvenih rizika u Bosni i Hercegovini](#), za kojeg podršku pruža Vlada Švicarske, a implementira ga Svjetska banka u partnerstvu s entitetskim Ministarstvima zdravstva, entitetskim Zavodima za javno zdravstvo i drugim domaćim partnerima.

**Kontakt:**

*U Sarajevu:* Jasmina Hadžić – [jhadzic@worldbank.org](mailto:jhadzic@worldbank.org) – 033/251-502

Da saznate više o ovoj inicijativi, molimo posjetite:

Facebook: <https://www.facebook.com/KlimaBezDima/>  
Instagram: @KlimaBezDima